



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Responsio Ad Accusationes Quibus De Mala Doctrina  
Accusatur Apud S. Sedem Florentius De Cocq Ecclesiae S.  
Michaëlis Antverpiæ Ord. Præmonstrat. ... In Libello, Cui  
Titulus: Propositiones per Belgium ...**

**Cocq, Florentius de**

**Lovanii, 1693**

Conclusio.

**urn:nbn:de:hbz:466:1-40343**

# CONCLUSIO.

**H**Æc sunt, quæ ad accusationes mihi objectas modò respondere placuit; ut pateat, quo merito & zelo accusatores nostri, nos signanter hic accusent, studioso silentio prætermiſſis illis, qui easdem opiniones constantius, & operosius hic palam propugnant. Non quasi illorum Societate, aut sorte causam meam tuendam esse censeam: sed solummodo, ut palam fiat (aliàs apertum satis) quanto partium studio Accusatores nostri laborent in accusando.

Liceat tamen & nobis unicum hinc admonere, scilicet jam dudum aliquos sub larva Baii, & Jansenii, doctrinam de gratiâ per se efficaci; doctrinam, inquam, Scholæ Augustinianæ & Thomisticæ præcipuam, ac fundamentalem, impugnasse. Notarunt id jam pridem ante nos Doctores Salmanticensis in suo cursu Theolog. tom. 5. tract. 14. q. cx1. Disp. 6. de gratia efficaci. Dub. 1. §. v. num. 32. ubi aiunt de Ripalda Soc. Jesu in hoc modum: *Ex Molinistis agit contra Jansenium Ripalda: at hic auctor post prolixum laborem nil contra Jansenium in hac parte concludit. Non enim impugnat differentiam ab eo assertam, nempe gratiam status Innocentiæ esse ex se indifferentem, gratiam verò hujus status esse ex se efficacem: sed ailo prorsus diverſit totos nervos intendens, ut gratiam per se efficacem demetat. In quo quamvis satis callidè se gerat, impugnans sub Baianorum larva Thomistas: egit tamen inutiliter, ne dicam infeliciter. . . . sententia quippe, quæ auxilia per se & ex se efficacia depredicat, certissima est, & Communis inter D. Aug. & D. Thomæ discipulos, utpote qui Augustinum habent patronum, & Pelagianos ac semipelagianos, & eorum reliquias proſternit. Unde Innocentius X. post editam adversus V. Jansenii Propositiones Constitutionem, semel & iterum declaravit se minimè intendisse Doctrinam de Gratia per se efficace, directè vel indirectè attingere: ediditque circa hoc speciale decretum in Congregatione generali S. Inquisitionis habita die 23. Aprilis 1654.*

Et hic quidem id attentavit contra gratiam per se efficacem occulto, & (ut illi DD. aiunt) callido Marte: sed alii id attentarunt aperto; inter quos P. Honoratus Fabri, cujus hæc est sententia in terminis, quam habet in Præfatione ad Lectorem: *Dico eandem esse gratiam efficacem prædeterminantium, Jansenii, & Calvinii, id est, efficacem intrinsecè.* Quam quidem opinionem tamquam toti Scholæ Augustinianæ ac Thomisticæ, adversariam, majori jure accusare poterant Accusatores nostri, nisi partium studio, hanc & alias similes declinassent.

Ut interim constet, quia reverentiâ, & quo studio Ordo noster Præ-

mon-

monstratensis in Belgio, & S. Sedis auctoritatem, & S. P. N. Augustini dogmata *inconcussa ac tutissima* prosequatur; addere lubet statutum Ordinis nostri Anno 1643, Datum Lectoribus S. Theologiæ, & hætenus observatum, quod sic habet: *Porro, in materiâ de gratiâ omnes humillimi P. S. Augustini sententiam sequantur, & ab eâ (quoadusque aliud definerit Ecclesia) nullâ ratione develli se patiantur, nedum plus naturæ viribus, & minus gratiæ tribuunt, quam oportet, à gratiâ deserantur: & in se stantes non stent; sed spiritu veræ humilitatis vacui turpiter labantur.*

Notent hoc ii, qui lugillare pergunt, nos bullas Pontificias non morari, sed solummodo putandum, quod quidpiam in S. Augustino invenerimus, ut fundatum, & alia nobis objecta. Attendant, inquam, quid statuatur, & sequamur, scilicet, S. Augustini dogmata, juxta Pontificia oracula *inconcussa & tutissima*, in materiâ de gratiâ constanter docenda; sed, *quoadusque aliter definerit Ecclesia*; cujus judicio nos submittemus alacriter; & si nos aliter erudire dignata sit, confitebimur nos homines, id est, errori obnoxios fuisse, scientes ex S. Augustino lib. 3. Crescon. c. 3. quod sententiam falsam numquam tenere, prima laus sit; secunda, mutare.

Denique concludo cum Doctore Angelico dicentē 2. 2. q. 11. art. 2. Quod contra Summi Pontificis auctoritatem, *nec Hieronimus, nec Augustinus, nec aliquis Sacrorum Doctorum suam sententiam defendit. Unde Hieronimus ad Damasum Papam (& nos cum ipso) hæc est fides Papa beatissime, quam in Catholica didicimus Ecclesia: in qua, si minus peritè, aut parum cautè fortè aliquid positum est, Emendari cupimus à te, qui Petri Fidem & Sedem tenes. Si autem hæc nostra Confessio Apostolatus tui judicio comprobatur: quicumque me culpæ voluerit, se imperitum, vel malevolum, non me hæreticum comprobabit.*

F I N I S.